


Jose Uranga

ECOVIN ELKARTEKO ZUZENDARI TEKNIKOA

«Kanpoko merkatuari eutsi eta barrukoa zabaldu nahi dugu»

Ecovin elkarteak Econavarra feria aukeratu du bere burua ezagutzera emateko. Ardo ekologikoa egiten duten upeltegiak bildu dira elkarte horretan, nekazaritza ekologikoa bultzatu eta ardo ekologikoaren salmenta indartzeko asmoz. Lanean hasteko, Ardo Ekologikoen I. Feria egiten ari dira Iruñeko Zitudadelan, Econavarra erakustaldiaren baitan. Igandean amaituko da.



JOXE LACALLE

JOSE URANGA DA ECOVIN elkarteko zuzendari tekniko. Nafarroako ardo ekologikoa gure herrialdean bertan saltzeko dauden zailtasunak nabarmendu eta elkartearen helburu nagusia merkatu berri bat zabaltzea dela azpimarratu du.

■ Nola sortu da Ecovin, zein helbururekin?

Orain dela hiru hilabete sortu genuen, eta elkarteak antolatu lehen ekitaldia Ardo Ekologikoen Feria izan da. Elkartea sortu da batez ere mahats ekologikoarekin egindako ardoa bultzatzeko, salmentak indartzeko eta gure produktuak ezagutzera emateko. Izan ere, oraindik jende askok ez daki nekazaritza ekologikoko ardoa zer den.

■ Eta zer da, hitz gutxitan, ardo ekologikoa?

Mahats ekologikoarekin egindako ardoa da, funtsean. Hori da jendeak argi izan behar duena. Mahats ekologikoarekin errazagoa da ardo ona egitea. Mahastiei dagokionez, ekologiko izateko hainbat baldintza bete behar dituzte, bai erabiltzen dituzten ongarri eta bestelako produktuen jatorriari

dagokionez, naturala izan behar baita, bai eta laborantza metodoari dagokionez ere.

■ Ardo ekoizleen elkarteak da Ecovin?

Hamaika bazkide dira, eta gehienak Nafarroako upeltegiak dira. Badira kooperatibak ere bai.

■ Zer baldintza bete behar da elkarteko bazkide izateko?

Ardo ekologikoa egitea, besterik ez. Hasieran pentsatu genuen bazkideek mahatsa landu eta ardoa egin beharko luketela, baina, azkenean, aukerak zabaltzea eta baldintza bakarra ardo ekologikoa egitea izan zedin erabaki genuen. Baina, finean, bat izan

ezik elkarteko gainontzeko kide guztiek ardoa egin eta mahatsa landu dute.

■ Kopuruari dagokionez, ardo produktio osoa kontuan hartuta zer leku betetzen du ardo ekologikoa?

% 3-4 ingurukoa izan da ardo ekologikoak duen presentzia. Hamahiru upeltegi daude Nafarroan ardo ekologikoa egiten dutenak. Mahasti ekologikoek hartzen duten lekuari dago-

soslaia

Ecovin eta Biolur elkarten artean harreman estua dago. Jose Uranga Biolur bultzatu zuen taldeko kide izan zen duela hamar urte, eta orain ardo ekologikoaren alde hasi da lanean, Ecovin elkarteko zuzendari tekniko gisa.

Biolurrekin duen harremanari uko egin gabe, bere bidea egitea erabaki du Ecovinek, eta, horretarako, Ardo Ekologikoen I. Feria antolatu du. Elkarteko bazkideen produktuak ezagutzera emateko beste hainbat feriatan parte hartuko du datozen hilabeteotan.

Igandea arte izanen da zabalik feria Iruñean, eta 500 pezetaren truke Zitudadelan bildu diren upeltegiak ardo dastatzeko aukera izanen dute bertaratzen direnek.

kionez, 400 hektarea inguru dira. Azken bospasei urteotan gora egin du nekazaritza ekologikoak, baina oraindik lan asko dago egiteko.

■ Elkarteak ardo ekologikoaren salmenta bultzatzeko sortu da neurri batean, erran duzunez. Zaila da oraindik produktu ekologikoa saltzea?

Argi dago ardo ekologikoaren merkatua zabaldu egin behar dugula, hori da gure

helburua. Hasteko, jendeari ezagutzera eman behar diogu gure produktuak nolakoak diren, kalitateko produktuak direla jakinarazi behar diogu. Une honetan ardo ekologikoa saltzen da kanpoan, nekazaritza ekologikoa garatuagoa dagoen lekuetan; Alemanian eta Danimarkan, adibidez. Hemen gutxi saltzen da. Hemengo ekoizleek ere kanpoan saltzen dituzte euren produktuak. Horregatik, gure asmoa da kanpoko merkatu horri eustea eta barrukoa zabaltzea.

■ Barruko merkatuari dagokionez, zeintzuk dira zailtasun nagusiak?

Egun, kalitatea ez da ordaintzen, eta, beraz, ez da erraza merkatu bat irekitzea, merkatu ezberdin bat zabaltzea. Ardoarekin gertatzen dena da prezioagatik edo markagatik saltzen dela. Ardo ekologikoa kalitateko ardo da, eta prezioa, noski, ho-

rren arabera izanen da. Nik uste dut produktua ezagutzera emateko lan egin behar dugula batez ere, ardo ekologikoa egiten ari diren upeltegi guztiak enpresa gazteak baitira. Euren lekua aurkitu behar dute oraindik.

■ Helburu hori lortzeko lehen urratsa da egunotan Iruñean egiten ari zareten Ardo Ekologikoen Feria. Zer espero duzue?

Jendea hurbiltzea, elkartearen diren upeltegiak ezagutzea eta gure ardoak dastatzeko. Nafarroako upeltegiak arduradunekin batera, Errioxako eta beste hainbat lekutako hainbat ekoizle ere etorriko da, haien esperientzia ezagutu ahal izateko. Gure ibilbide publikoa hasteko leku proposena Econavarra feria zela uste genuen, eta horregatik aukeratu dugu elkartearen aurkezpena egiteko.

→ Eudurne Elizondo